

## Þjónusta til framtíðar

**Prestsþjónusta Íslenska safnaðarins í Noregi** var með sama sniði árið 2010 og hin síðustu ár. Þjónustan hefur tekið nokkuð mið af búferlaflutningum landans yfir hafið. Þar er helst að merkja aukningu í sálgæslusamtölum og þá aðallega símaviðtölunum. Prestur hóf framhaldsnám í sálgæslufræðum við guðfræðiháskólann í Ósló (MF) í lok árs með það að marki að mæta betur þessari auknu þörf og auka gæði þjónustu safnaðarins. Sálgæslusamtal er ekki meðferðarviðtal í sjálfu sér heldur er einstaklingum eða fjölskyldum mætt um ákveðinn tíma þar sem prestur fær að ganga veginn með viðkomandi um stund í samtali ef vera mætti til stuðnings. Við það opnast oft ný sýn á lífið, bæði tilfinningalega, trúarlega og verkefnalega.

Góður samstarfsandi, nærandi og kærleiksríkt andrúmsloft ríkir meðal þeirra sem gegna þjónustu og trúanaðarstörfum<sup>1</sup> innan safnaðarins enda ber okkur að kalla þau til starfa sem vilja veg kristinnar mestan og bestan. Vilji stendur til þess að fylgjast vel með hvar hægt er að gera betur í vaxandi safnaðarstarfi. Trúin og krafturinn er mikill og við biðjum Drottinn um að vísa okkur veg sinn í þjónustu til framtíðar.

### 1. Guðsþjónustur og helgihald

Messað var á einum 12 stöðum árið 2010. Þeir staðir sem messað var á á árinu eru: Ósló, Drammen, Fredrikstad, Stavanger, Bergen, Þrándheimur, Tromsø, Skien, Geilo, Ålesund, Molde og Reykjavík. Þeir aðrir staðir sem hafa fasta tengiliði og farið verður til ef óskað er eftir eru: Kristiansand og Karmøy. Haldnar voru 25 kirkjuguðsþjónustur, 47 bæna- og/eða helgistundir og 39 barnaguðsþjónustur.

**Guðsþjónustur og helgihald** var ágætlega sótt, mæting var allt frá 20 til 400 manns og trónir þá hæst jólaguðsþjónustan annan jóladag í Ósló, aðventukvöldið og Lýðveldishátíðarhöldin. Við skipulag á guðsþjónustunum um landið eru **tengiliðirnir** ómissandi sem fyrr. Þeir aðstoða m.a. við að bóka kirkju, auglýsa, sækja prest á flugvöll (ef þarf), sjá um að hringja út og minna á messuna og að sjá um að halda utan um messukaffið á eftir ásamt Íslendingafélagunum. Þessi aðstoð tengiliðanna er ómetanleg og er hér þakkað sérstaklega fyrir það. Tengiliðirnir eru oftast en ekki formenn Íslendingafélaganna eða starfa náðið með þeim.

**Safnaðarstjórn** fór með prest í messuferð til Bergen í mars og til Stavanger í október og hélt þar vinnufundi og tók þátt í messuhaldinu. Mikilvægt er fyrir landsbyggðina að sjá framan í þau sem mynda safnaðarstjórnina. Í dag situr einn fulltrúi frá Tromsø í safnaðarstjórn.

---

<sup>1</sup> Með trúanaðarstörfum er átt við þau sem taka að sér þjónustu í þágu safnaðarmeðlima s.s. safnaðarstjórn, sunnudagaskólaleiðtoga, tengiliði, tónlistarfólk, sjálfbóðaliða, lesara, kaffiumsón, o.fl.

**Ískórinn** syngur við guðsþjónustur í Ósló. Kórinn kom með til Bergen og Stavanger á árinu og leiddi messusönginn. Ískórinn starfar fyrir söfnuðinn eins og kirkjukór og heldur uppi helgihaldi safnaðarins í Ósló með sálmasöng og messusvörum. Hér er Ketil Grøtting stjórnanda kórsins og organistanum Peggy Jensen Lous sérstaklega þakkað fyrir metnaðarfulla þjónustu. **Nýr Íslendingakór** hefur verið stofnaður í Bergen og söng í fyrsta skipti í jólamessunni við undirleik Ingibjarts Jónssonar. Von er til að þetta samstarf haldi áfram og íslensk tunga í tónum fái að blómstra í Bergen sem annars staðar. Hjörleifur Valsson fiðluleikari, Daníel Ó. Daníelsson bassi og söngkonurnar Margrét Grétarsdóttir, Nanna Cortes og Linditta Ottarsson hafa litað helgihaldið fögrum litum.

**Í Stavanger** hefur Katrín Ósk Óskarsdóttir (19) sungið og spilað á píanóið í messunum. Hennar fallega rödd hefur sungið sig inn í hjörtu kirkjugesta. **Í Bergen** hefur Rebekka Ingibjartsdóttir (15) leikið á fiðlu svo fallega og glatt kirkjugesti. Þá hefur Ingibjartur Jónsson faðir hennar séð um orgelleik í messunum. Það er ómetanlegt fyrir söfnuðinn að eiga hæfileikaríkt fólk sem tilbúið er til þjónustu úti á landsbyggðinni.

**Alþjóðlegur bænadagur kvenna** er fyrsta föstudag í mars ár hvert. Hefð er komin á með að Íslenski söfnuðurinn tekur þátt ásamt fleiri kristnum söfnuðum í Nordbergkirkju. Það er mikilvægt fyrir lítinn söfnuð að finna sig í hópi trúsystkina víða að úr heiminum. Þarna mættu fleiri mæta, bæði konur og karlar.

**Aðventuhátíðin í Ósló** var virkilega vel sótt í ár. Pálmi Gunnarsson ásamt hljómsveit flutti fallegar perlur og Ískórinn söng af stakri snilld sem hin fyrri ár undir styrkri stjórn Ketil Grøtting kórstjóra Ískórsins. Davíð Þór Jónsson guðfræðinemi flutti hátíðarræðuna í ár.

## **2. Aðrar kirkjulegar athafnir og kærleiksþjónusta**

Árið 2010 voru skírð fimmtán börn, 8 í kirkjum en 7 í heimahúsum. Hjónavígslur voru fjórar. Fimm kveðjuathafnir. 23 börn sóttu **fermingarfræðslu** safnaðarins veturinn 2009-10. Og fermd börn innan safnaðarins voru 12.

Prestur sinnti **sálgæslu og kærleiksþjónustu** sem fyrr og fór í 17 hús- og sjúkravitjanir á árinu. 84 sálgæsluviðtöl voru veitt á skrifstofu/kirkjum eða hótelum (78 árið 2009 og 25 árið 2008) og 161 símaviðtal var veitt (74 árið 2009 og 8 árið 2008).<sup>2</sup>

**Ólafúsjóður Íslenska safnaðarins í Noregi** var stofnsettur 1.nóvember 2009. Í annarri grein skipulagsskrár segir: “Sjóðnum er ætlað að mæta tímabundnum erfiðleikum t.d. í tengslum við veikindi, dauðsfall eða önnur áföll sem dunið geta yfir einstaklinga og fjölskyldur. Einnig skal kanna þörf á úthlutun fyrir jólin. Sjóðsstjórn metur þörf hverju sinni.”. Í sjóðsstjórn sitja ásamt presti, Kristján

---

<sup>2</sup> Árið 2008 þjónaði prestur aðeins 6 mánuði – tölur fyrir hinn helming ársins eru ekki til.

Daðason ritari safnaðarstjórnar og Dr. Sigríður Dúna Kristmundsdóttir sendiherra. Hægt er að sækja um í sjóðinn á þar til gerðu eyðublaði sem hægt er að nálgast á netinu: [www.kirkjan.no](http://www.kirkjan.no) eða hjá starfsmanni eða presti.

Ólafíusjóður úthlutaði árið 2010 bæði til Rauða krossins á Íslandi samkvæmt aðalfundarsamþykkt og til einstaklinga og fjölskyldna sem búsett eru í Noregi.

### **3. Safnaðarstarfið**

**Sunnudagaskóli** er nú starfræktur reglulega á vegum safnaðarins í Ósló, Drammen, Bergen og Stavanger og Fredrikstad. Söfnuðurinn vill endilega heyra frá fólki sem er tilbúið að koma af stað sunnudagaskóla um landið. Við barnastarfið starfa nú níu leiðtogar. Sakarías Ingólfsson guðfræðinemi sem starfað hefur fyrir söfnuðinn í mörg ár hætti sl.sumar þar sem hann og fjölskylda hans fluttu búferlum. Umsjón með sunnudagaskólanum í Ósló hafa þær Helga Kolbeinsdóttir, Hrefna Grétarsdóttir og Marta Ingólfssdóttir. Lilja Björk Þorsteinsdóttir og Katrín Ósk Óskarsdóttir hafa umsjón með barnastarfi í Stavanger og í Bergen hafa umsjón með sunnudagaskólanum Helga Sigríður Þórsdóttir og Ingibjartur Jónsson sem einnig er liðtækur á orgelið þegar messað er. Svala Snorradóttir hefur umsjón með sunnudagaskólanum í Drammen. María Gunnarsdóttir guðfræðinemi hefur verið með sunnudagaskóla í Fredrikstad ásamt Helgu Kolbeinsdóttur. Fengur er fyrir söfnuðinn og alla kristni að hafa gott og áhugasamt fólk á akrinum.

Prestur hóf átak í að koma inn á íslensku heimilin sunnudagaskólanum á DVD sem og geisladisknum "Ég get sungið af gleði" með sunnudagaskólasöngvunum. Með þessu er reynt að mæta börnunum í dreifðinni.

**Hið árlega Leiðtoganámskeið** á vegum fræðslusviðs Biskupsstofu var þetta árið haldið hér í Ósló. Tókst námskeiðið vel og fóru allir heim með nesti til uppfræðslu vetrarsins. Mikill vöxtur er í barnastarfi safnaðanna á Norðurlöndunum.

**Æskulýðshópur safnaðarins** er starfræktur nokkuð óhefðbundið. Félagar í æskulýðsfélaginu geta verið þau sem eru fermd og hafa áhuga á því að skemmta sér á heilbrigðan hátt í góðum félagsskap hvers annars og vilja halda við fermingarheitinu. Ár hvert er farið til Íslands á Landsmót Æskulýðsfélaga og í október 2010 fór hópur skemmtilegra unglinga til Akureyrar. Þar voru samankomin um 700 unglingar sem höfðu það markmið að leysa þrælabörn á Indlandi úr ánauð. Allir komu sælir aftur heim eftir vináttu- og gleðiríka ferð. Æskulýðshópur safnaðarins er hluti af æskulýðssambandi Þjóðkirkjunnar – ÆSKÞ.

**Fermingarbörn** koma frá stór- Óslóarsvæðinu, Drammen, Skien, Bergen, Stavanger, Fredrikstad, Ålesundsvæðinu og Grimstad. Fermingarfræðslan hefur farið fram á skrifstofu safnaðarins, á heimili prests, á hótélum og á tveimur námskeiðum í Svíþjóð. Eins hefur prestur verið í

netsamskiptum við fermingarbörn og foreldra. Eins og undanfarin ár hittast fermingarbörn íslensku safnaðanna í Noregi og Svíþjóð í september og í maí á fermingarfræðslunámskeiði. Þessi kynni barnanna eru ómetanleg sem og öll samvinna prestanna. Fermingarbörnin hafa verið mjög dugleg við að aðstoða þegar messað er á þeirra heimasvæðum.

**Hjónanámskeið og sjálfstyrkingarnámskeið fyrir konur** voru haldin og unnin í samstarfi prests og sálfræðingsins Eyglóar Sigmundsdóttur. Í Stavanger var haldið sjálfstyrkingarnámskeið fyrir konur og farið var helgarferð til Norefjell þar sem Kyrrðar- og sjálfstyrkingarnámskeið var haldið. Áætlað er að halda námskeið um bænina og ef áhugi er fyrir að bjóða upp á að koma af stað "12 sporin andlegt ferðalag".

#### **4. Samvinna og upplýsingamál**

**Fréttabréfið** kom tvisvar út á árinu, í lok janúar og september. Ætlunin er að halda þeirri útgáfu áfram. Hrafnhildur Brynjarsdóttir grafískur hönnuður hefur sett upp fréttabréfið og verið presti innan handar með yfirlestur ásamt Ingu Erlingsdóttur starfsmanni. **Facebook** síða var stofnuð "Íslenski söfnuðurinn í Noregi" ásamt facebook síðum fyrir sunnudagaskólann í Bergen og Stavanger. Þar eru settar inn messuauglýsingar og aðrar þær upplýsingar sem þarf til að koma tilkynningum til sóknarbarna. Eins hafa messuauglýsingar verið settar inn á facebook síðu "Íslendingar í Noregi" og svo auðvitað inn á heimasíðu safnaðarins [www.kirkjan.no](http://www.kirkjan.no)

**Lýðveldishátíðin** er haldin í Ósló í samstarfi við **Íslendingafélagið í Ósló**. Hátíðarhöldin hefjast með helgihaldi og hefur gefist vel að vera í og við Nordbergkirkju. **Messukaffið** er framhald guðspjónustunnar. Það er dýrmætt fyrir okkur að geta sest niður og mætt hvors annars andlitum, drukkið kaffi og spjallað saman. Íslendingum og Íslendingafélögum um landið er þakkað fyrir að halda utan um þetta ómetanlega kaffisamfélag.

Mikilvægt er fyrir söfnuðinn og prest að geta leitað til **Sendiherra** og starfsfólks alls á sendiráðsskrifstofunni. Sú samvinna og stuðningur sem þaðan kemur er mjög mikilvæg fyrir þjónustuna.

Nú eru aðeins tveir prestar eftir af fjórum sem tilheyra **ÍKE** (Íslenska kirkjan erlendis). Lögð hafa verið niður þrjú embættanna vegna niðurskurðar og aðeins eitt þeirra (í Gautaborg) hefur verið endurskipulagt og fjármagnað með öðrum hætti í bili. Vonir standa til að þessi embætti verði endurreist þegar betur árar og í samvinnu við heimakirkjur.

**Inga Erlingsdóttir** sem starfar á skrifstofu safnaðarins hefur verið presti innan handar við hvað eina sem komið hefur upp. Íslendingum fjölgar í Noregi og samhliða þá fjölgar þjónustubeiðnum til safnaðarins og umfang starfanna eykst. Það er mikilvægt að hafa bæði safnaðarstjórn og samstarfskonu á akrinum sem styður við kristni og þjónustu alla. Osvald Kratz

hefur sýnt tryggja og áhugasama þjónustu með því að mæta hvern fimmtudag á skrifstofuna með fallegt smurbrauð fyrir gesti og gangandi. Guð launi honum þá fyrirhöfn alla.

Óslóarbiskup og dómprófastur hafa boðað prest til **samráðsfundar og prestafundar**. Það hefur verið ánægjulegt að finna sig í hópi kollega í norsku kirkjunni. Það er von mín að allt samstarf við systurkirkju okkar, norsku kirkjuna haldi áfram að styrkjast.

*Ég þakka alla vináttu og velvilja sem hefur verið í kærleiksríkum anda Jesú Krists. Megi góður Guð blessa okkur öll í þjónustunni við Guð og menn til framtíðar.*

*Arna Grétarsdóttir,*

*Prestur Íslenska safnaðarins í Noregi*

*Ósló í mars 2011*